



Gobierno kier coregi informacionnan eroneo y e insinuacionnan sin base cu sr. Pontilius ta lanzando den prensa



STA. CRUZ -- Relaciona cu e ultimo declaracionnan haci pa e Secretario General di e Federacion di Trahadornan di Aruba (FTA), sr. Anselmo Pontilius, gobierno un biaha mas kier coregi e informacionnan eroneo y e insinuacionnan sin base cu sr. Pontilius ta lanzando den prensa. Aparentemente, banda di e malezanan manera diabetes, presion halto, problema di curazon, sobrepeso etc. cu ta afecta e calidad di bida di un parti grandi di nos conciudadanan, awor ta parce cu tin personanan den nos comunidad, cu tin e aspiracion di ta lidernan, ta sufrir di e enfermedad "amnesia selectivo" ora ta conveni nan. Manera sr. Anselmo Pontilius mes a declara na varios ocasion, e tin lazonan special cu ex-Sheraton Hotel (ex-Aruba Palm Beach, ex-Aruba Grand Hotel), pasobra ta

na e hotel ey el'a cuminsa su carera profesional. Si mester kere sr. Pontilius, te ainda el'a keda cu contacto estrecho cu su ex-colega y e miembronan di staff di e resort. Cu otro palabra, pa motibo di suboncontactonan cu e ex-trahadornan di Aruba Sheraton, Aruba Palm Beach y Aruba Grand Hotel, kendenan pa añanan largo tabata miembro di FTA, e Secretario General di FTA lo mester tabata hopi bon na altura di loke tabata pasa den e hotel y di e plannan di su intimo amigo Jack Ottinger, ex-doño di e hotel. Tambe t'asina cu e Secretario General di FTA na varios ocasion ta referi na e palabracion of acuerdo sin precedente cu el'a yega cu Gerencia di Occidental Allegro Aruba, caminda e empleadonan di Occidental Allegro Hotel temporalmente a wordo 'gehuur' na otro hotelnan

durante e periodo cu Occidental Allegro tabata den renovacion. Mirando e contactonan estrecho cu e Secretario General di FTA tin cu e ex-trahadornan di Sheraton, Aruba Palm Beach, Aruba Grand Hotel, cu e ex-doño di e hotel (sr. Jack Ottinger), cu e gerencia di Occidental Allegro Hotel, ta improbabil, pa no bisa imposibel, cu sr. Anselmo Pontilius for di comienzo di aña 2005 no tabata na altura cu sr. Ottinger kier a bende e hotel y cu Occidental Allegro Aruba Hotel kier a compra e propiedad. Na luna di Mei 2005 e Vice Presidente di Occidental Hotels & Casino ta dirigi un carta na gobierno di Aruba pidiendo cooperacion di gobierno pa e compra di e propiedad (Aruba Grand Hotel) for di sr. Jack Ottinger. Occidental tabata interesa pa compra e propiedad y pa expande

esaki cu entre 250 y 350 kamber una vez cu nan caba cu trabaoan di renovacion na e ex-Hotel Americana, Allegro Resort. Ni un siman despues cu gobierno a ricibi e carta di e Vice Presidente di Occidental Hotels & Casino, gobierno ta ricibi un yamada di un representante di sr. Ottinger, informando gobierno cu sr. Ottinger no ta interesa pa bende e propiedad cu Occidental, pasobra e resort lo tabata tin problemanan serio cu renovacion di e Allegro Resort. Sr. Ottinger tabata teme cu Occidental lo no por "handle" e renovacion y expansion di Aruba Grand Hotel. Segun e informante sr. Jack Ottinger tabata tin cierto palabracion cu e sindicato FTA of en todo caso cu e Secretario General pa loke ta trata "job security" di e trahadornan di Aruba Grand Hotel. Dos siman despues, representantenan di RIU Hotels & Resorts ta bishita nos isla den un "fact finding mission" y ta reuni cu representantenan di sr. Jack Ottinger y Silver Moon Hotel & Casino (Aruba Grand Hotel). Dia 9 di Juni 2005 e abogadoan di sr. Jack Ottinger/Silver Moon Hotel & Casino y di RIU Hotels & Resorts ta firma un "memorandum of understanding" relaciona cu e compra y venta di Aruba Grand Hotel (pues e propiedad y no e accionnan di Silver Moon Hotel & Casino N.V.) Ambos partido ta pidi cooperacion di gobierno relaciona cu plannan di

RIU pa cu expansion, renovacion y upgrading di e hotel. Tambe nan ta pidi gobierno pa duna nan e permiso y licencianan necesario pa por expande y renova e resort. Aki claramente e partidonan ta referi na e trabaoan di construcion.

Dia 30 di Juni 2005, gobierno pa medio di carta no. MA/1094, ta informa Silver Moon Hotel & Casino y RIU Group cu gobierno a ricibi nan carta y ta dispuesto pa duna su cooperacion contal cu e partidonan cumpli cu e condicionnan cu gobierno a formula y stipula den e carta ya menciona. Door cu gobierno a wordo informa y tabata bao di impresion cu FTA tabata na altura di e plannan di Sr. Ottinger pa bende e hotel, y cu FTA y Ottinger tin cierto palabracionnan encuan to "job security" di e empleadonan di Silver Moon Hotel & Casino, gobierno bao punto 12 di e carta fecha 30 di Juni 2005, no. MA/1094, a stipula:

The rights of the employees, presently employed by Silver Moon Hotel & Casino shall be respected and honored. When planning a temporary shut down in connection with the hotel renovation, we advise you, already in a very early stage, to contact the labor union or hotel workers' representatives. The Department of Labor Affairs shall also be consulted in regards to that matter."